

दिनांक 16.10.2025

समय: 18.45 बजे

आकाशवाणी जयपुर-अजमेर
प्रादेशिक समाचार

- प्रधानमंत्री नरेन्द्र मोदी कह्यो—देश मांय बिजली री प्रति व्यक्ति खपत बध र 1400 यूनिट व्ही।
- केन्द्रीय मंत्री अश्विनी वैष्णव कह्यो—देश ने खुद रे पाण ऊबो करण री दिशा मांय तेज़ी ऊँ काम कर्यो जा रह्यो है।
- परिवहन विभाग जैसलमेर बस हादसा री जांच सारू पांच सदस्यां री समिति बनायी।
- राज्य सरकार सहकार सदस्यता अभियान 22 अक्टूबर ताई बधायो।

प्रधानमंत्री नरेन्द्र मोदी कह्यो है के स्वच्छ ऊर्जा अर बिजली री पहुँच रा मामला मांय देश मांय तेज़ गति ऊँ बधोतरी व्ही है। वे आज आंध्रप्रदेश रा कुरनूल मांय करीब 13 हजार 430 करोड़ रुपया री केई विकास परियोजनावां रा उद्घाटन करण अर विकास रा कामां री नींव रखण रे मौके बोल रह्या हा। वे कह्यो के देश रा हर गांव ताई अब बिजली पूग गयी है अर प्रति व्यक्ति बिजली री खपत बध र 14 सौ यूनिट व्हे गयी है। वे कह्यो के सरकार ए.आई रा हल्का मांय भारत ने आगे बधावण मांय लगातार काम कर रह्यो है।

000

नई दिल्ली मांय राखी ज्या सेना प्रमुख सम्मेलन मांय भाग ले रह्या संयुक्त राष्ट्र सैन्य योगदानकर्ता देशां रा सेना प्रमुख अर उप-प्रमुख आज राष्ट्रपति द्रौपदी मुर्मू ऊँ मुलाकात कीनी। ई मौके राष्ट्रपति दुनिया मांय शांति अर थरता बनायी राखण मांय संयुक्त राष्ट्र शांति मिशन रा काम री सराहवणा कीनी।

000

गृहमंत्री अमित शाह कह्यो है के सरकार भ्रष्टाचार, अपराध अर आतंकवाद ने बिल्कुल बर्दाश्त नी करण री नीति माथे चाल रही है। वे **भगोड़े अपराधियों के प्रत्यर्पण से संबंधित चुनौतियां और रणनीतियां** मुद्दा माथे सीबीआई री ओर ऊँ आज नई दिल्ली मांय सरु व्ह्या दो दिन रा सम्मेलन रा उद्घाटन सत्र मांय बोल रह्या हा।

000

अजमेर मांय केंद्रीय कृषि अर किसान कल्याण राज्य मंत्री भागीरथ चौधरी बैंकर्स समिति राजस्थान री ओर ऊँ चलायी ज्या **‘आपकी पूंजी, आपका अधिकार’** अभियान रो उद्घाटन कीनो। ई रा तैत जनता ने बैंकिंग सेवावां, निष्क्रिय खातां री जाणकारी अर सुरक्षित वित्तीय व्यवहार रा बारा मांय बतायी ज्यो।

000

युवा कार्यक्रम अर खेल मंत्रालय **विकसित भारत युवा नेता संवाद क्विज-2026** मांय हिस्सो लेवण री आखिरी तारीख 31 अक्टूबर ताई बधा दीनी है। मंत्रालय रे मुजब **माई भारत पोर्टल** रे मार्फत हाल ताई 20 लाख ऊँ बत्ता नौजवान भाग ले चुक्या है।

000

जैसलमेर बस हादसा पाछे परिवहन विभाग जोधपुर मांय बणायी ज्यी बसां री जांच कर रह्यो है। हाल ताई 66 बसां ज़ब्त करी जा चुकी है। मामला री जांच सारू अपर परिवहन आयुक्त री सदरत मांय पाँच सदस्यां री समिति बणायी ज्यी है। ई सागे ई पुणे रा केन्द्रीय सड़क परिवहन संस्थान-सी.आई.आर.टी. ऊँ ई तकनीकी जाँच करायी जावेला। जोधपुर रा ज़िला परिवहन अधिकारी बतायो के प्रदेश ज़िला मांय बसां री जांच रो खास अभियान चलायो जा रह्यो है।

जैसलमेर मांय लारला दिनां व्ह्या बस हादसा पाछे परिवहन विभाग रा चित्तौड़गढ़ दफ़तर रा कार्यवाहक आरटीओ अर एक सहायक प्रशासनिक अहलकार ने मुअत्तल कर दिया ज्यो है। चित्तौड़गढ़ पुलिस परिवहन विभाग रा दफ़तर ऊँ हादसा री शिकार बस रा रजिस्ट्रेशन ऊँ जुड़्या कागज़ात अर सीसीटीवी फुटेज री डिजिटल वीडियो रिकॉर्डिंग-डीवीआर ज़ब्त कर लीना है। ई बीचे जैसलमेर बस हादसा मांय मरण वाळां री तादाद बध र 22 व्हे ग्यी है।

000

रेल अर सूचना अर प्रसारण मंत्री अश्विनी वैष्णव कह्यो है के साल 2014 पाछे देश गुलामी री सोच छोड़ र खुद रे पाण ऊबो व्हेवणो तैय कीनो है अर वां सारू तेज़ी ऊँ काम चाल रह्यो है। वे आज जयपुर मांय 'आत्मनिर्भर भारत संकल्प अभियान' रा कार्यक्रम मांय बोल रह्या हा। श्री वैष्णव कह्यो के केंद्र सरकार री देश ने खुद रे पाण ऊबो बणावण री नीति रे कारण देश इलेक्ट्रॉनिक सामान बणावण रा मामला मांय तेज़ी ऊँ तरक्की कर रह्यो है। वे कह्यो के मोबाइल बणावण सारू वां रा पुर्जा ई अब भारत मांय बण रह्या है।

केन्द्रीय मंत्री कह्यो के सेमीकंडक्टर अर वंदे भारत रेलगाड़ियां ई भारत रा तकनीकी बूता री प्रतीक है। वैष्णव कह्यो के तेज़ी ऊँ करी ज्यो फैसलां ऊँ देश री माली व्यवस्था जोरदार गति ऊँ आगे बढ़ रही है।

श्री वैष्णव कह्यो के राजस्थान मांय ई 85 रेलवे टेशनां ने और बेहतर बणावण रा काम तेज़ी ऊँ कर्या जा रह्या है। एक और कार्यक्रम मांय रेल मंत्री कह्यो के जयपुर मांय रेलवे रो विश्व स्तर रो डेटा सेंटर बणायो जावेला, ज्यी सारू ज़मीं री पिछाण करण रो काम चाल रह्यो है। वे कह्यो के ओ सेंटर अत्याधुनिक सॉफ्टवेयर विकास अर डिजिटल इंडिया सारू नुवो केंद्र बणेला। इण ऊँ पैली आज संवारे श्री वैष्णव जयपुर कने खातीपुरा रेलवे टेशन माथे उत्तर-पश्चिम रेलवे रा 65 टेशनां माथे मुसाफिरां ऊँ जुड़्या सुबीता जनता ने सूंप्या। ई मौके वे जयपुर-असारवा एक्सप्रेस रेलगाड़ी रा ए.सी. डिब्बा मांय सफ़र करण वाळां सारू प्रिंटेड लिनेन कंबल कवर व्यवस्था री सरूआत कीनी। ई दौरान श्री वैष्णव कह्यो के मुसाफिरां रो सफ़र आसाण बणावण सारू रेलवे कानी ऊँ भांत-भांत रा नुवा काम कर्या जा रह्या है। कार्यक्रम मांय सांसद घनश्याम तिवाड़ी अर मंजू शर्मा समेत जनता रा केई नुमाइन्दा ई मौजूद हा।

000

भीलवाड़ा मांय आज नगर विकास न्यास री ओर ऊँ आठ आवासीय कॉलोनियां रा 381 प्लॉटों री लॉटरी निकाली ज्यी। ई मौके शहरी विकास अर आवासन मंत्री झाबर सिंह खर्वा कह्यो के प्रधानमंत्री अर मुख्यमंत्री री हर गरीब ने घर री छत मुहैया करावण री सोच सागे आवता बगत मांय और नुवी आवासीय योजनावां बणायी जावेला।

000

शहरी सेवा पखवाड़ा रा तैत भरतपुर नगर निगम मांय लगायी ज्यो शिविर मांय संभागीय आयुक्त डॉ. टीना सोनी पात्र 55 लोगां ने ज़मीं रा पट्टा दीना। ई मौके संभागीय आयुक्त कह्यो के राज्य सरकार जनता ने वां रा हक दिरावणो तैय कीनो है। वे अहलकारां ने शिविर मांय आवण वाळा पात्र लोगां ने बत्ता ऊँ बत्तो फायदो देवण रो हुकम दीना।

000

राज्य मांय दीवाळी ने ध्यान राखता थकां आवता तीन दिन मांय दमकल गाड़ियां री तकनीकी हालत, कार्यक्षमता अर कर्मचारियां री तादाद रो पूरो मूल्यांकन कर्यो जावेला। स्वायत्त शासन विभाग रा सचिव रवि जैन आ जाणकारी दीनी। वे बतायो के राज्य रा सगळा दमकल दलां रो सर्वे करावण रा हुकम दीना है।

000

राज्य सरकार 'सहकार सदस्यता अभियान' 22 अक्टूबर ताई बधा दीनो है। सहकारिता मंत्री गौतम कुमार दक आ जाणकारी दीनी। वे बतायो के छुट्टी रा दिनां रे अलावा सगळा दिन पैक्स मांय शिविर लगाया जावेला। वे बतायो के अभियान ऊँ नौजवानां अर महिलावां ने सहकारिता ऊँ जोड़बा री कोशिश करी ज्यी है अर हाल ताई 8 लाख 71 हजार ऊँ बत्ता नुवा सदस्य बणाया जा चुक्या है।

000

राज्य सरकार अंता विधानसभा उपचुनाव सारु वोट देवण रा अर वोटों री गिणती रा दिन सूखा दिवस रो ऐलाण कीनो है। सूखा दिवस 9 नवम्बर सिंज्यां 6 बजां ऊँ 11 नवम्बर सिंज्यां 6 बज्यां ताई अंता विधानसभा हलका अर तीन किलोमीटर री परिधि मांय रहवेला। ओजू वोट पड़बा री सूरत मांय संबंधित केंद्रां माथे ई सूखा दिवस रहवेला। ई बीच उपचुनाव सारु आज दो और पर्चा दाखिल करी ज्या, ज्यीं पाछे हाल ताई भरी ज्या पर्चा री तादाद 7 व्हे ग्यी है। नामपाना 20 अक्टूबर ताई भर्या जा सके है।

000

डीग ज़िला मांय चिकित्सा विभाग री ओर ऊँ चलाया जा रह्या "तंबाकू फ्री यूथ कैपेन" रा तैत तंबाकू काम लेवण ऊँ व्हेवण वाळी अल्सर अर कैंसर सरीखी बीमारियां रा बारा मांय जाग जगायी जा रही है। अभियान रा तैत वॉल पेंटिंग बणावण, सोशल मीडिया रे जरिये अर स्कूलां अर मोहल्लां मांय तंबाकू मुक्ति शपथ दिरावण सरीखा कार्यक्रम राख्या जा रह्या है।

000

प्रधानमंत्री नरेन्द्र मोदी ई महीना री 26 तारीख ने आकाशवाणी ऊँ प्रसारित कर्या जावण वाळा खास कार्यक्रम "मन की बात" मांय विचार बतावेला। आ ई कार्यक्रम री 127वीं कड़ी व्हेला। ई सारु आप ई मुफ्त नम्बर 1800-11-7800 माथे सुझाव भेज सको हो। ई रे अलावा नरेन्द्र मोदी एप अर माय जीओवी ओपन फोरम रे जरिये ई विचार भेज्या जा सके है। भी विचार भेजे जा सकते हैं। आप 24 अक्टूबर ताई राय भेज सको हो। ओ कार्यक्रम आकाशवाणी अर दूरदर्शन रा पूरा नेटवर्क, आकाशवाणी समाचार री वेबसाइट अर न्यूज़ ऑन ए आई आर मोबाइल एप माथे ई प्रसारित कर्यो जावेला। मन की बात कार्यक्रम रो प्रसारण आकाशवाणी समाचार, डीडी न्यूज़, प्रधानमंत्री रा दफ्तर अर सूचना अर प्रसारण मंत्रालय रा यू-ट्यूब चैनलां माथे ई कर्यो जावेला।

000